

LATGALIŠU GAZETA

Daugovpiļš – piļsāta ir, Daugovys nav

Jums liksis provokatīvs roksta nūsaukums. Tak pastuoštit, lyudzu, kai nu Daugovpiļš centra piit pi Daugovys? I kū ti var interesantu padareit? Vineiguo maņ zynomuo vīta ir pi Daugovpiļš rajona padūmis ākys, natuoli nu tyлта, kur zam ceļa pa tysmu i drusku smakojūšu arku var daleist pi Latvejis valsts lapnuma – liktiņupis Daugovys. Ūtrys variants ir it izreiz iz tyлта, tod jam puori tikt ūtrā krostā. Bet iz vysa pasaulā piļsātys ir lapnys, ka ir pi kaidys upis, ti gar krostu vysod ir pa kaidai kopejneicai, ispieja pasavyznuot ar laivu i izbaudeit iudiņa burveibu i spēku...



Jureits

Nazkod latgališu literats Raibis Suņš raksteja leidzeigi par Rēzekni kai "piļsātu Latgolys sirdi" – piļsāta ir, tikai Latgolys nav.

Ari Daugovpili na tikai Daugovys nav, praktiski nav sateikami ari Latvejis austrumu dalis formali pamatizveivuojuji – latgališi. Na veļti naseņ Latvejis Televizejys raidejuma "100 gr. kultūras" veiduojuji, atbraukuši iz Daugovpili, par eksotiku uzskatejuši puors latgaliski runojušu jaunišu. Vinolga skaisti – parunuoja latgaliski, pareklamieja Daugovpili kai multikulturalu piļsātu.

I kai ta beja Daugovpiļš piļsātys svātkūs? Vysā treju diņu programmā nu latgališim itykuse tikai muzykys grupa "Dabasu Durovys", koč ari na iz svātku golvonus skatuvis.

Vyspuor zeimeigi, ka piļsātys golvonajā laukumā uzastuoja paprostuo Krīvejis popseiguo grupa "Čajs deļ diveju". Navaicuošu, kaidu honoraru papraseja kaimiņu valsts zvaigznis, bet rudis, ka Latvejis muoksliniki na slyktuoķ kvalitatē i varbut pat lobuok varātu nūspēlēt. Bet ite ir otkon Daugovpiļš specifika, kas pyrms vieliešonu aktualizējas vēļ vairuok – videjais piļsātys vālātuos tūmār ir krīvu volūdā muzicejušuos popkultūrys leidzjutiejs, deļtam ari tautai vajadzēigys atbylstūšys izprīcys. Pi tam itys jau nabyus vīneigais pop-zvaigžņu koncerts, lai pīsaisteitu vālātuoja uzmaņeibu. Tai saceit, kaidys videjais vālātuojys, taidi (atbylstūši) ari pop-leidzekli. Vysa kuo asam redziejuši piļsātā

itymā pavasari – lai proskrin 6.juņš, tod jau tiksīm otkon pi mīreiguos i meiluos palākuos Daugovpiļš.

Nabyušu originals – kotrā zini nūejit tymā dinā i nūbolsojīt, koč drusku izlicīt atsvoiru voldūšajam pop-bolsuojuam. Par kū bolsuoit? Nazynu – gon jau koč mozuokū ļaunumu da atrāsīt.

Bet piļsātys svātku sajiuta tūmār tyka nūgiuta piec tam cītūksnī, kur, koč ari puors pasuokumi vadeiti krīviski, tok lela daļa beja ari latviski, a golvonais, ka isadeve saktikt daudz rodūšu Daugovpiļš cylvāku, ar kū naformalā gaisūtne puorrunuot par Daugovpiļš kultūrys atteisteibys teņdencem i puorsprīst vīnu ūtru jaunu ideju.

Daugovpiļš tipisko kasdīnys aina: kopejneicā skaņ krīviski runojuša radeja voi ti pat tuolruods raida kaidu raidejumu nu kaimiņvalsts. I, ka pīzvoni iz komunalajom istuodem, tod pretim ir kaidys, kas latviski da golam nasaprūt, deļtam sarunuot tikšonūs iz reitdīnu jis jau gaida tuos pošys dīnys pušdiņlaikā.

Vysom pasaulā krīzem puori naatkareigi nu Daugovys upis teciejuma, dzeivis dreizuma i vysaidim pyrmsvieliešonu trokumim: 1.) nu latgališu drukys aizlīguma atceļšonys paguojuši 105 godi, koč ari laika pūsmūs 1934.-1941.godā i piec tam 1956.-1988.godā latgališim sovā zemē otkon beja nūlīgts latgaliski drukuot; 2.) paguojuši 92 godi nu slovanuo Rēzeknis kongresa, kod latgališi beidzūt izsaceja sovu redzini tuluokai Latgolys resurss "Latgališu Kultūrys gazeta" aba LaKu-

Ga.LV dorbojās bez puortraukuma jau 2 godus; 4.) Laikroksta "Latgales Laiks" piļykumam "Latgališu Gazeta" ari apskriejs jau vīns gadeņš... i tys na vys.

Vysleluokais trokums itaidā 21.godu symta skriejumā ir tymā, ka Latvejis valstei jūprūjom nav nikaidys statistiky par tū, cik ir latgališu. Libieši ir saskaiteiti, a latgališus nivins nav skaitejs, deļtam, nu vīnys pusis, var saceit, ka leluokuo daļa nu Latgolys idzeivuojuom i kaidys procentys nu Reigā dzeivuojušajim ir latgališi (kūpā varātu byut ap 500 000), bet tikpat labi var pasaceit, ka vairs nav nivina latgališa – vysmoz piec oficialajim valsts datim tai jau sait.

Atkuortuošu vēļ vīnu jūceigū dūmu – mes varam tikt da tam, ka piec kaida laika terminu "latgalīts" izmontuos kai psihiskys slimeibys apzeimiejum. Jums varbut tys liksis smikleigi voi aizvainojuši, bet, ka tai ar vāsu pruotu padūmoj, tod jau tagad daudzēji soka: "Tei ir tikai cylvāka nazkaida puorliceiba, ka jam ir sova volūda, sova kultura, tradicejys, vide..." Vēļ kaidys daliks: "Tei volūda nateik vuiceita nivinā školā. Itei sovdaibeiguo volūdys sorguošonys māneja puorsvorā ir puormontojama nu vacuokim. Bet cylvāks dzeivys laikā var nu tuos izauorsteit, ka na piļneigi, tod daleji. Ari tod vysleidza juopatur pruotā, ka bārnim otkon ir beistameiba ar itū virusu saslimt nu jauna."

Tei puorliceiba, ka Tu esi latgalīts, sabīdreibā vysmoz daleji teik skaiteita par apkaunojušu voi vysmoz par koč kū nanormalu, deļtam ka

na jau visim ir itaidys "personeibys daleišonuos" sindroms: školā – latvīts; sātā – latgalīts.

Bet ari pi vysa tuo lykums ir paredziejs, ka "personom ar psihiskim trauciejumim i psihiskom slimeibom ir juonūdrūšnoj vysys pylsūņa, politiskuos, ekonomiskuos i socialuos tiseibys, kurys paradz lykums. Cylvāka psihiski trauciejumi voi psihiskuo slimeiba nadreikst byut par īmesli cylvāka diskriminacejai." Nu tod jau sait tai, ka, asūt par psihiski slymu, ir vairuok tiseibu nakai asūt par latgaliti!

I tod jau izreiz juoatsažeist: es ari naasu normals. Normali i lobuoki brauc iz Reigu voi pavysam iz cytom uorzemu valstīm, a Latgolā i Daugovpili palik tikai troki latgališi.

Na veļti Daugovys upis skaistumu vyslobuok myusu piļsātā var nūvērtēt Grīvys cītumā meitūši, a na piļsātys idzeivuojuoti i gosti. Ti tak ari normalūs nalik. Nanormali pīder Latvejis ūtrai leluokajai ar Daugovys upi boguotajai piļsātai.

Bet vys nav tik trokai – latgališi vēļ ir dzeivi, lai ari jim daudzēji lik kluoit pīzeimi "trokais". Ar napaciteibu gaidēsim, kod Daugovpiļš teatrs uzvess sovā repertuarā pyrmū lugu latgaliski, kas īgiva pyrmū vītu paguojušuo goda lugu konkursā. Vēļ ir ticeiba, ka Latgolā i Daugovpili koč pa mozam, bet ir ispiejama latviskuma i latgaliskuma leidzvierteiga leidzpastuoveišona kūpā ar cytu tautu etniskajim centinim saglobuot sovu volūdu, kultūru i muzyku.

Kū vaira volūdu, tū lobuok!

LaKuGa.LV

NŪTIKŠONU KALEŅDERS

● Myusdīnu latgališu rokstu volūdys kursi

1., 8. i 15.junī Reiga, Latvejis Nacionaluo biblioteka, Kr. Barona iļā 14, 312.ustoba

Praktiskuos nūdarbeibys volūdys apgivei.

17:00 – nūdarbeiba īsuociejim: pyrmī sūli volūdā, runā, raksteibā (voda Kristīne Zute)

18:15 – nūdarbeiba raksteibys apģiušonai tim, kas jau runoj i roksta (voda Muora Mortuzāne)

Kursi ir par veļti. I tim, kas vuicuos. I tim, kas vuica. LgSC bīdri vuica sovu volūdu sovejim.

● Literarūs dorbu konkurss

Latgolys kultūrys centra izdevnīceiba izsludynoj literarūs dorbu konkursu (eisī stuosti, literaturkritiski roksti, dzeja, filozofiski apceriejumi), kas paradzāti literaturys almanaha "Olūts"14. laidīņam, kas izis 2009.goda oktobri-novembri. (P. Stroda raksteibā.)

Dorbu apjūms – ap 20000 zeimu, dzejai – 350 ryndys. Paradzātys 3 premijys kotram literaturys žanram: I – 175 Ls, II – 150 Ls un III – 125 Ls.

Dorbi syutami LKC izdevnīceibai leidz 2009. goda 15. juņam.

Vairuok informacejis: LaKuGa.LV

● Seminars Latgolys školu jaunuotnei ATZOLYS 2009

Ari itūgod nūtikis "Atzolyss" – seminars Latgolys jaunīmšim vacumā nu 15 da 18 godu.

Seminars nūtikis Preiļūs 2009. goda 2.-6. augustā

Dasacejumus gaideisim da 2009. goda 15. juņa (posta zeimūgs).

Sovu CV i motivacejis viestuli (parkū Tu gribi pīsadaleit "Atzolyss" i kū ceri nu jūs īgiūt) syuti iz e-posta adresu: linda_ole@yahoo.com

Vairuok informacejis: LaKuGa.LV

● Leiguo svātku ileiguošona

22.junī Kruoslovys rajona Ezernīkūs

Latgališu dzīsmis, danči, gunkurs i lobi ļauds jau trešū godu Latvejis skaistuokuo i solom boguotuoķuo azara krostā!

Vairuok informacejis: LaKuGa.LV

● LaKuGa.LV maja ziņu arhivs:

Latgolys Radeja. In memoriam?

Kū skaiteisim žurnala "Katōļu Dzeive" maja numurā?

Kas ir skotuviska luga

Viljānu tierga breinumi

Latgolys Vuords nu Reigys / 21.majs

8 sūleiši lugas uzraksteišonai

Latgolys sirds. Veļti vozuota

Latgališu diņa Breivudobys muzejā

Atzineibys krysts dramaturgam i režisoram

Arturam Rubeņam

Muzeju nakts pīceni

Vysur mīreigs laiks, ka es pošā mirā beju

105 godi nu drukys aizlīguma atceļšonys

Latgolys Vuords nu Reigys / 14.majs

Audio reklamys rulleits par LaKuGa.LV

Video/ "Vuolyudzānu" pyrmuos vīty īgīviejs

Šys tys nu Tievānānu pavasara 2009

Ontonam Slišanam atzineibys krysts

Latgolys Vuords nu Reigys / 7.majs

dūmu pylni pogolmi/majs

Latgališu muzykys lobdareibys koncerts Peliečūs

Karūgu laiks

"Latgališu Gazetu" atbolsta Latgolys regiona atteisteibys agentura i Kulturkapitāla fonds.

